



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Fifa Best Awards: Lionel Messi-i best male player sempet angu

Iowa senden nung Trump-i takok angu

VOL. XXI NO. 94 (ADOK 94) DIMAPUR

RASEMNÜ (WEDNESDAY)

ANJETI (JANUARY) 17, 2024

₹ 5.00

Modi Sarkar ki Guarantee
Nisung ajak atema travel facilities tajung aser tasen

Amrit Bharat Station Scheme kübok railway stations 1300 tema tasen küma yanglushitsü aser renlochtsü

Hamara Sankalp Viksit Bharat

Yimten melatetba atema Naga nunger ratar, PM Modi-i küm 9 tejakdang nangzükba meinyaker: Rahul Gandhi

Kohima, January 16, 2024 (TYO): Naga yimten olemtep tejakleni maoba atema Naga nunger ratateper aser iba ya Prime Minister Narendra Modi-i nangzükba ama mienyakba ajanga lir ta Congress lennir Rahul Gandhi-i ashi.

"Ni Naga lennir kar den jembio go aser olemtep tejakleni maoba atema parnok rataba shiogo. Prime Minister-i yimten latetsü atema kechi bilem onoki memetet" ta Chiephobozou, Kohima nung Rahul-i osangbener den jembidang ashi.

"Framework Agreement ya superficial document ka lir aser iba ajanga yimjung aser külem tashi lemsateptsü indang ashir saka iba tetezüji kechi'ar mejangja" ta pai ashi.

"Prime Minister-i kechi inyaksü meranger Naga telok aikati memetet. Iba khuret atema bangzüng ka nungdaker. Khuret atema sensaksem nungdaker, kati ka angatsüla aser külemi lemtet ka agitsü atema inyaksüla aser ibaji Prime Minister dak mali" ta Rahul-isa ashi.

"Prime Minister-i junga



mebilemdangi nangzükber. Pai lanurtem dang shisaliok aser mapa atema aika nangzükogo" ta paisa ashi.

Küm 9 tashi kecha meinyakba atema Prime Minister dak tamang mali kümogo. Küm 9 tejaklen pai nangzükba raksaogo ta Rahul-isa ashi.

INDIA Alliance-i Naga yimten latetsü atema tenangzükba lir ta osangbeneri asungdangdang Rahul-i langzü.

INDIA Alliance-i 2024 election takok angutsü: Lok Sabha elections nung INDIA Alliance-i BJP den toktepa takok angutsü. Bharat Jodo Nyay Yatra (BJNY) ya tangatetba indang lir aser nübortem indang tebilemtsü kar

lemsateptsü. Linük nung temeten anema kanga inyaksangshir, ta Rahul-i ashi.

"Onoki election maparen inyaksü saka iba yatra ya nübortem tsungdang tangatetba kar lemsateptsü aser ibaji BJP mangdang den balaka asütsü" ta pai ashi.

INDIA Alliance tsungda olemtep junga dang agia arudar aser menden lemsateptsüba den tanga onüktem angatetteptsü. Congress-i tesempatep linük ka maginür saka longjema aser ajak kasa aliba linük ka aginür, ta Rahul-isa shisem.

Ram Temple onük: January 22 nü Ayodhya nung Ram Temple lapokba sentong nung Congress madener kechiyong iba ya 'political Narendra Modi' sentong ka lir.

"Iba ya RSS-BJP sentong ka kümogo aser iba jagi Congress president-i sentong nung madentsü ta shiogo. Onoki tamangba yimsü ajak agizükber. Hindu ketdangsurtemia yimjak nung January 22 sentong ya

political sentong ka lir ta shiogo. Anungji India Prime Minister aser RSS indang sentong ka nung adentsübaji kanga tasak" ta Rahul Gandhi-i ashi.

"Onok den yaritepertem dang shirnokisa dennür denang ta onoki jangja shiogo" ta paisa ashi.

Congress-i "political function" ka nung adentsü makok. BJP aser RSS-i iba sentong nung political aser election dendaktsüogo, ta paisa ashi.

"Nagaland ya state tila ka dang asüyonga linük nung tangartem den kasa dang ta bilemtsüla" ta Rahul-i ashi.

BJNY indang tangatetba ya nübortem nem temeten agütsütsü aser ajak nem politics, loktiliba aser rongsenketzüng kasa agütsütsü atema lir ta pai ashi.

Congress-i tesüiba mapang South India nungi Kashmir tashi Bharat Jodo Yatra tenzüka agi. Iba ya sobaliba, tamangba yimsü aser oshi balala külemi akümtsü nükjidadong nung agi, ta pai ashi.

"Tang atema onoki North East nungi rally ka tenzütsü lemtet.

Onoki Manipur nungi tenzüker aser tang Nagaland adener. Nenok temeim atema kanga pelar" ta Rahul-isa ashi.

Mongulbarnü Kohima adena südang nisung meyrjang aika adenshia Congress lennir Rahul Gandhi pelaa agizük.

Deobarnü AICC president Mallikarjun Kharge-i Manipur nungi BJNY tenzüka liasü. Iba sülen yashi nikongdang Nagaland kübok Khuzama yimtsüng atong aser idakji yipzük.

Tanep Rahul-i Viswema yimtsüng nungi yatra tenzüker aser World War-II cemetery semdanga narojung yutsü. Iba mapang Nagaland Pradesh Congress Committee president S. Supongmeren Jamir dena liasü.

Tseminyu district leni aodang Rahul Gandhi-i tetsü (grandmother) nungtem nung yangluba Indira Gandhi Stadium Kohima semdanga liasü. Iba tesem nung tanga 66th Kohima Village Sports Association meet agidar aser idakji pai saisapongertem den ajurutepa sensaksem.

Rahul Gandhi-isa Nerhe Pheza nung Captain Kenguruse Memorial semdang aser pai Wokha district kübok Chukitong yimtsüng nung yipzüktsü. Asungnep pa Mokochung district-i apusoa aotsü aser idangji Zunheboto district kübok VK Town nung lokti sentong ka nung o jembitsü.

Rahul Gandhi-i asung Tuli nung yipzüktsü aser January 18 anepdang Assam-i apusoa aotsü.

Dimapur nung traffic tenokdangba agütsür

Dimapur, January 16, 2024 (TYO): January 17, 2024 nü India Tir Dimapur Airport nung arua anenzüktsü aliba atema anepdang 11:00 ako nungi nikongdang 2:00 ako tashi 'roadside parking' masütsü tetuyuba agütsüogo.

Iba osang ya Commissioner of Police, Dimapur Kevithuto Sophie, IPS-i sangdong ka nung ashi.

CONTINGENCY TRAVEL ROUTE

*Dellai Gate to Dimapur Airport

via DC Court Jn/ Notun Bosti Jn/ City Tower/ Veterinary Jn/ Purana Bazaar Jn/ Padampukhuri Jn/ T.K. Service Jn/ Airport Jn.

*Veterinary Jn to District Hospital Dimapur via Walford/ Super Market/ Nagarjan Jn.

*Airport to Police House, CMD via Green Park Jn/ Sovima Village Gate Jn./ DC CMD Jn/ RP Gate No. 2/ GP Gate No.1.

*Central Jail, 4th Mile Jn to CIHSR Hospital.

Rahul Gandhi nem ILP agütsü

Itanagar, January 16, 2024 (Agencies): Arunachal Pradesh nung Itanagar district administration-i Congress lennir Rahul Gandhi nem Bharat Jodo Nyay Yatra atema inner line permit (ILP) agütsüogo.

Itanagar Capital Region (ICR) deputy commissioner Talo Potom-i Congress lennir Rahul Gandhi nem ILP agütsü.

Rahul Gandhi-i aniba Bharat Jodo Nyay Yatra ya January 20 nü Assam nungi Arunachal

Pradesh atongtsü.

Rahul Gandhi nem agütsüba ILP ya anogo 10 atema lir aser iba nung pai Holongi, Banderdewa, Naharlagun Raliway Station aser airport nung aliba check-gates ajanga Arunachal Pradesh-i aittsü akok ta shia lir.

Osang angazükba agi Rahul Gandhi-i Gumto check-gate ajanga Arunachal-i aittsü aser kilometers 20 jajar Itanagar atongtsü.

NSF-i Free Movement Regime agienba aitsür

Dimapur, January 16, 2024 (TYO): India sorkari Free Movement Regime (FMR) agientsü mapa inyakba magizükber ta Naga Students' Federation (NSF)-i metetdaksüogo.

Iba lemtet ya Naga nunger putiotsü aser temeten anema lir aser North-East Frontier Region nung mangatetep tuluba kümdaktsütsü, ta NSF President Medovi Rhi aser General Secretary Chumben Khuvung nati ashi.

Chindwin ayong aser Saramati tenemkong tsungda aliba ali ya tang Burma tsütsü lir saka iba ya Naga nunger senmang nung tongtipang shilem ka lir. Anungji India-i iba putiotsü ochi

ya agizüktsüla aser ibaji Naga nunger meyong lir NSF-i metetdaksü.

Iba arrtsü ladangtsür küm 80 tema arur aser iba ajanga North-East Frontier Region nung mangatetep aser telungpur khuret adokdaksü. Iba tebilemtsü mekottet tashi mangatetep maneni alitsü, ta parnokisa ashi.

Saramati tenemkong anatsülen alirtem kanga timtema aruogo. Burma tsütsü aliba Naga nunger Burma sorkar den aser India tsütsü aliba Naga nunger India sorkar den raratep adokdaksü, ta NSF-isa metetdaksü.

Anungji Naga nunger tsungda atsu atsidangtsüba mapa ya Naga

nunger temeten aser tashi anema lir. Naga nunger longjema melidaktsütsü atema inyakba mapa yagi tebang meputep aser mepetmesü ang tali adoktsü. India ya tebilemtsü khuret abenba linük ka lir anungji Naga nunger tsungda atsu atsiütsü temeten mali ta agizüktsüla, ta NSF-isa ashi.

Centre sorkari FMR agientsüba lemtetba ya tebilemtsü ka lir kechiyong FMR ajanga India-Myanmar arrtsü nung alir Naga nunger tsungda tesentaktep akangshiogo. FMR agienba ajanga tesentaktep noktangba dang masü saka tensa mejungi akümtsü ta parnokisa metetdaksü.

Tuensang nung district court complex semzükogo



Dimapur, Aenjeti/January 16 (TYO): Gauhati High Court (the High Court of Assam, Nagaland, Mizoram & Arunachal Pradesh) indang Chief Justice (Acting), Justice Lanusungkum Jamir-i January 16, 2024 nü District Court Complex Tuensang semzükja liasü.

Iba sentong nung tongti tesemdang ka ama jembidang, nürtem dang judiciary system dak tamang akatsü ayongzük aser yangji nürtemi tejangja timtem lemsatepsü akok ta ashi.

Pai Judiciary system nung metaloka aliba, tekeraba nung ken o jembitsüba, ken o matsülangtsü asoshi judicial infrastructure peria aliba amala indang nürtem nem angatetdaksü.

2016 küm Chief Justices Conference alidang judiciary infrastructures jangjatetsü asoshi Chief Justice-i tapet mera agitsü, court complex tem indang project mapang shidak nung renemtsü, mapang shidak nung project tem renemdaktsütsü asoshi repringshimtsü committee shimtsü, judicial infrastructure terenlok asoshi district ktdangsur aser state sorkar

nung telemtetba agirtem tsüngta amalitep akatsü lemteta liasü, ta pai ashi.

Chief Justices Conference nung lemtetba ama Tuensang indang district court complex ya mapang shidak nung renemogo, ta pai ashi.

State nung justice delivery system tashi taitba kumdaaktsütsü asoshi sorkari yariba aser amalitep akaba, stakeholders temi shilem agiba atema pelaba pai ashi.

Advisor, Department of Law & Justice and Land Revenue, T.N. Mannen-i iba sentong nung jembidang customary law tajungba kuma yanglushitsü nüngdakba indang jembia aser terenlokba melira mapet akumtsü, ta ashi.

Iba sentong ya complex tasenba nung Kumdilong Kessen, NJS, Civil Judge (Sr. Division) Chief Judicial Magistrate, Longleng, Civil Judge (Sr. Division) JMFC, Tuensang (Additional Charge) onir sür agia liasü.

L Ongmang, Pastor, Yungküik Baptist Church Tuensang Town ajanga sarasadema sentong tenzük aser Lirili aser Repetel nungeri temeja ken ka aten.

N Longshithung Ezung, NJS, Principal District & Sessions Judge, Tuensang ajanga tarur pela agizükba o jembia aser Er. Sungtiba Amer, Assistant Chief Engineer, CAWD, Nagaland ajanga technical report agütsüdag iba project atema estimated cost sen lakh 643.97 liasü saka sen lakh 672.59 agi renem ta ashi.

Iba ki ya Saramati Construction ajanga April 2017 nung tenzük aser November 2023 nung takok ngua renem. Iba ki tasenba ya G+6 storied RCC structure aser total Plinth Area ya 18,578 sq.ft alitsü.

Iba sentong nung Chuba Yimchunger, President, Bar Association, Tuensang; Lithrongla T Rutsa, NCS, Deputy Commissioner Tuensang aser R Ramakrishnan, IAS, Principal Secretary, Department of Law & Justice nungeria o tatsütsü jembia liasü.

Iba sentong nung Justice Kakheto Sema, Judge Gauhati High Court aden aser Yarenjungla Longkumer, NJS, Secretary (Judicial), Department of Law & Justice ajanga melepzüng o jembia liasü.

Nagaland Angh-i Mimkut benjong salem lemsatep

Dimapur, Aenjeti/January 16 (TYO): Kuki nungertem dangi Mimkut benjong salem abener, ta Nagaland Angh La Ganesan-i sangdong ka ajanga ashi.

Iba tebour tajung benjongmung ya tsüksüng-ensünga alu aruba bilemtetba

kisüing masü saka Kuki nunger sobaliba tajung benjongba lir, ta ashi.

Iba tepela benjong ya lungjemshiba aser yimchiyimjung benjong ka asütsü imla atar. Asenok külemi aluruba temoatsü benjongdang

asenoki telungjem, dangar dang aria bilemba aser kati ka akumtsübotsü bilemtetti.

Ajidang masü asenoki asen sobaliba wazüka Nagaland ya dangar dang nungi tajungba kumdaaktsütsü merangti, ta Nagaland Angh-isa ayongzük.

BJP Nagaland-i kitsük-kirong lendong ajurur alir nem teyari agütsü



Dimapur, Aenjeti/January 16 (TYO): Bharatiya Janata Party (BJP) Nagaland State ktdangsurtemi Khermahal, Dimapur nung kitsük-kirong lendong ajurur alirtem nem Mongulbarnü teyari agüja liasü.

January 8, 2024 nü iba kitsük-kirong lendong ajurur alirtem nem

teyari ya State BJP tir Benjamin Yephthomi lenisüba kübok agüja liasü.

Iba mapang Nyamo Lotha Colony, Dimapur nung sentong tongmelang ka agi, kong kitsük-kirong lendong ajurur alir kibong 13 nungi nisung 22 nem jang o tzi aser tabentsü sü agüja liasü.

Iba sentong nung BJP state ktdangpur, state spokespersons, state social media team, State Mahila Morcha, State Yuva Morcha, State ST Morcha, State Kisan Morcha, State Minority Morcha, State OBC Morcha aser Dimapur District BJP President aser ktdangpurtem dena liasü.

Mokokchung DPDB aser R-Day mapalem senden menogo

Dimapur, Aenjeti/January 16 (TYO): Mokokchung District Planning & Development Board (DPDB) aser Republic Day anogomung atema mapa alemba senden ka Deputy Commissioner, Mokokchung indang Conference Hall nung January 16, 2024 nü mena liasü.

Iba senden nung Deputy Commissioner and Vice Chairman, Mokokchung DPDB, Thsuvisie Phoji mendenpuba sür mena liasü. Senden tenzük mendenpubai jembidang taküm Parliamentary elections aliba ajanga pei mapa dak alia mapa tali inyaktüsü akumer, ta ashi.

Iba atema pau züngsem ajanga dang amalitep akatsü ayongzük. Paisa tang tashi employees list magütsü aliba heads of offices tem dang tekeratiba nung agütsütsü metetdaksü.

Iba senden nung ADC Mokokchung, Chumlamo

Humtosoe-i züngsemtem dang Town Graveyard aser jana indokba tesem dak sendakba osang agüja liasü. Tang aliba leper nung tasü mang tasen aremstü tesem mongutetba aser leper tasen mongutetba mechi committee ka kumteta lir, ta pai ashi.

Jana indokba tesem dak sendakba tebilemstü lemsatepba mapang, iba tebilemstü ajemstü atema Mokokchung Municipal Council ajanga action plan ka tenzükogo ta ashi aser kitchen waste management atema awareness tali agütsütsü nüngdaker ta ashi.

Board ajangasa Tuli Area Truck Union registration asoshi tim ktdangsur dangi abentsü lemtet.

Deputy Commissioner ajanga department ajanga dang Republic Day takok ngua mungtettsü asoshi mapa nungloktsüba ajak shidak inyaktüsü ayongzük liasü.

Küpza yimtak tanu Süngzük Semtu lapok



Küpza yimtak tanü Süngzük Semtu lapoker kelen Er.Repang Longkumer Chief Engineer(Retd) Kúpza Putu yimsüsür, Kúpza Senso Mungdang lenirtem aser sentong nung shilem agirtem külemi tangokba noksa.

Mokokchung, January/ Aenjeti 16(TYO): Kúpza yimtak tanu nür raliwali asürtem aser süngben tzütär anisüngzük amentsü asoshi asüba "Süngzük Semtu" Er.Repang Longkumer Chief Engineer(Retd)-i lapoktsüogo.

Iba Süngzük Semtu ya Kúpza nunger tangeteter

ishika temelunger tenla bendenteper asü aser tanu iba Süngzük Semtu sütetba ajanga iba semtu nung nürtem anisüngzüktsüta asüba tangatetba nung iba semtu dang "Süngzük Semtu" jatsüogota Kúpza Senso Mungdang Tir Wb Tinumayang-i metetdaksü.

PM-USP CSSS application agütsütsü anogo atsülanger

Dimapur, Aenjeti/January 16 (TYO): Academic Year 2023-24 atema National Scholarship Portal (NPS) nung Pradhan Mantri Uchchar Shiksha Protsahan Central Sector Scheme of Scholarship (PM-USP CSSS) application agütsütsü aser

Agütsütsü aser Ministry of Education, Department of Higher Education ajanga January 31, 2024 tashi atsülangtsüogo, ta Nagaland Board of School Education sangdong ka ajanga ashi.

Temsüa aliba kaketshir shirnokisa PM-USP CSSS apply süner, parnoki National Scholarship Portal (<https://scholarships.gov.in>) nungi agütsütetsü, ta sangdong ajangsa ashi.

IAF ajanga Agniveer Vayu atema application meshir

Dimapur, Aenjeti/January 16 (TYO): Agnipath Scheme Agniveer Vayu ajanga Indian Air Force ajanga application meshir.

Agniveervayu 01/2025 atema online registration ya January 17, 2024 anüngdang 11:00 ako nungi lapoktsü. Iba

online registration portal ya February 6, 2024 anüngdang 11:00 ako nung shibangtsü.

Jangra aliba aser temsüa aliba candidate (tetsür aser tebur) temi official website <https://agnipathvayu.cdac.in> ajanga online nung apply asütsü akok.



January 16, 2024 nü Shimla nung Himachal Pradesh Chief Minister Sukhvinder Singh Sukhu, Deputy Chief Minister Mukesh Agnihotri aser State Congress Tir, Pratibha Singh nunger party senden ka nung adendang tangokba noksa nung angur.

Vote ajangzüksü atema BJP-i yimsü amshir: DMK MP, TR Baalu

Chennai, Aenjeti/January 16 (Agencies): Ayodhya nung Ram tekülem ki semzüksü mapang ana nung lia Dravida Munnetra Kazhagam (DMK) party MP, T R Baalu-i sangdong ka ajanga BJP sorkar aitsüogo. Baalu-i, Centre sorkari vote ajangzüksü atema pei yimsü amshir aser iba ya democracy anema dang masü saka tanela anema lir, ta ashi.

Paisa, parnoki (BJP) tanela benjung ka agi yimtenren benjung ka kümdaktsübaji linük nübürtemi magizüksü, ta ashi.

Amongnüa DMK lenir, Ballu-isa, 2014 küm nungi Centre nung aliba BJP sorkari election mapang nung nangzükba ka danga mataloktsü, aser parnok tamakok mimbangtsü atema

Ram tekülem asübaji parnoki inyaktetba mapa ka ama sayutsü meranger, ta ashi.

BJP-i Tamil Nadu dang nangzükba kecha mataloktsü aser tziunglu den tziümsüng lendong agi kongshirtem nem-a teyari magütsü, ta pai ashi.

Centre sorkar maneni aija pai, "NDA sorkari inyaktetbaji totzü nung jenjang atuba aser 'rupee' jenjang tajemba akümba dang lir," ta ashi.

DMK tentetsang, C N Annadurai-i kin ka aser yimsü ka tangatetba nung party amenok, aser tang tashi party-i item tangatetba nung nokdaker; secularism pusemer saka tesempa politics anema nokdaker, ta pai metetdaksü.

"DMK-i adianu temeimtep atema nokdaker aser kodanga

yimtenren aser yimsü na mesendaktepdaktsü aser iba nungjagi maongka magi," ta pai ashi.

DMK ya mapang ajak nung nisung ajak asoshi party ka liasü, ta shia Baalu-i, "Chief Minister M K Stalin kübok sorkari tekülem ki meyrjang aika yanglushitsüogo aser sen crore 5,381 jenjang tekülem kitem atema kiojen agütsüogo, ajisüta vote angutsü atema election sabang nung onoki kodanga ibaji mejembi," ta pai ashi.

"Tsüngrem dak amangbaji kija ka tanela tziuraba lir, ibaji nija temeden lir. Yimtenren atema aser vote angutsü atema yimsü amshibaji India tanela aser temziung anema lir. Iba ya linük tarutsü atema majung," ta paisa metetdaksü.

Aviation Ministry-i tetuyuba tasen agütsür

New Delhi, January 16 (Agencies): Mepet-tziüsü ajanga tayimtsü senzüsempogba nung timtem agütsüba dak sendakba nung Civil Aviation Ministry-i tetuyuba tasen agüja metro airport trokprongla dang anogo shia item report asemen agüjang, ta metetdaksüogo.

Tayimtsü nung senzürtem timtem pungbatsütsü nükjiong nung Aviation Ministry-i Standard Operating Procedures (SOPs) sangdongogo aser airlines ajak dang telatetbatem nung aliba ama mapa küma inyaksü tuyuogo.

Mongolbarnü Civil Aviation Minister, Jyotiraditya Scindia-i 'X' ajanga metro airport trok nung 'War Rooms' amenoktsü

metetdaksü. Item war rooms ji airports aser airline operators-i amenoktsü aser passenger temi ajangshiba timtem balala atema rongdak süa inyaktüsü.

Minister Scindia-isa passenger tem timtem pungbatsütsü atema rongdak süa inyaktüsü aser airlines nung inyaktertem security atema Central Industrial Security Force (CISF) sepaitem peria lemzüksütsü, ta metetdaksü.

Delhi nung mepet tziüsü ajanga timtem agütsüba dak sendakba nung Minister Scindia-i Delhi Airport nung CAT III kübok runway RWY 29L amshitsü tuyu. CAT III system ya mepet tziüsü agi timtem agütsüba mapang nunga tayimtsü junga anendaktsütetba

system ka lir.

Ghonda 72 tsüngda Delhi nung mepet tziüsü aliba ajanga tayimtsü 600 shi menor ang apusoa liasü. Tsüngsang mopung kanga majungba ajanga linük nung senzüba aser bendang linük balala tashi senzüba tayimtsü 600 shi mapang shidak nung mesenzüteti liasü.

Delhi nung dang masü saka Hyderabad, Bengaluru aser Ahmedabad densema yimti aika nunga tsüngsang mopung majungba agi tayimtsü mapang shidak nung mesenzüteti liasü.

Minister Scindia-isa tsüngsang mopung majungba mapang nung tayimtsü ajanga ainlen senzürtemi-a iba timtem junga angatetsüla, ta mepishi.



January 16, 2024 anepdang Mirzapur nung aliba Ganga ayong nung nisung kati ozü nem chiyungtsü agütsüdang tangokba noksa nung angur.



**सी डेक
CDAC**




**ADMISSION SANGDONG
SC & ST CATEGORY NUNGI GRADUATE STUDENT TEM ATEMA HIGH
PERFORMANCE COMPUTING ASER IBA APPLICATION INDANG C-
DAC ADVANCED LEVEL DIPLOMA COURSE**

TEMETETSÜTEM

- Mapang : Ita 6
- Mode : Offline (Physical)
- Registration Fee Malitsü
- Course Fee : Rs.-1,75,000

ANGATI

TAJANGZÜK BALALA

- Industry nung mongintemi yaritsü
- C-DAC mongintemi sayutsü
- Ita shia stipends Rs. 10,000 MESÜRA Boarding aser lodging angati asütsü
- Technology tasentiba indang training session (hands-on) alitsü





**Tenüng agütsütsü atema
tatembangbuba anogoji
January 28, 2024**



c-huk@cdac.in



https://c-huk.cdac.in

CBC 06140/12/0007/2324

Maratha nunger lakh 54 nem Kunbi Caste certificate agüjang: Jarange

New Delhi, January 16 (Agencies): Mongolbarnü Maratha quota temeden atema nokdaker, Manoj Jarange-i state sorkar dang, anogo ana tsüngda Maratha nunger lakh 54 nem Kunbi caste certificates agüjang, ta takhangba agütsüogo.

Iba atemaji telemetba magira January 20 nü pai Jalna district kübok par yim Antarwali Sarti toktsür aotsü aser Mumbai-i oa Maratha reservation atema mapang kecha telatet makai lumia longkak aitsü, ta pai metetdaksü.

Tang tashi nung Maratha kin züngsem lakh 54 aluyimer Kunbi nunger lir ta jangjaogo aser item nisungtem (mesüra parnok dak nungi jakzükertem) nem tangsa Kunbi certificates agütsüsüla, ta pai metetdaksü.

"Yamaji meinyakra January 20 nü ni yimdam nungi apusoa oa Mumbai nung mapang telatet makai lumitsü," ta pai independent MLA, Bachchu Kadu aser chief minister office nung special duty officer,

Mangesh Chivte na nem metetdaksü.

OBC category kübok Kunbis nunger nem sorkar mapa aser shisaliok rejutem nung menden shiteta (reservation) yutsür.

Ajioda Kadu aser Chivte nati Jarange dang, kaket kuli nung ajemdaker certificates agütsütsü atema Bodhbar nikongdang tashi nung sorkari nungdakba ozüng ka benoktsü, ta nangzük.

Yimjak nung Jarange den jembidang Kadu-i, January 17-18 anogotem nung state tesem ajaklen camps ayongzüka agitsü aser kaket kuli shidak agütsürtemi Kunbi caste certificate atema application agütsütetsü, ta metetdaksü.

Mongolbarnü Chhatrapati Sambhajanagar nung osangbenertem den jembidang Kadu-i, tesüiba ita ana-asep tsüngda Marathwada region kübok district 8 nung documents crore 2 dak tema repranga asadangba sülen sorkar ketdangsertemi Kunbi caste certificates 14,148 bo agütsüogo, ta metetdaksü.

January 22 nü Mamata leniba nung 'Rally For Harmony' agitsü

New Delhi, January 15 (Agencies): Mongolbarnü Trinamool Congress tongti lenir aser West Bengal Chief Minister, Mamata Banerjee-i, January 22 nü Ayodhya nung Ram tekülem ki semzükba anogo nung Kolkata nunga la leniba nung 'rally for harmony' agitsü, ta metetdaksü.

Mamata Banerjee-i, Kalighat tekülem kidang Kali tsüngrem nem akhüm agütsüba sülen south Kolkata kübok Hazra crossing nungi rally tenzüksü, ta metetdaksü.

Mongolbarnü State secretariat nung osangbenertem den jembidang Mamata Banerjee-i, "January 22 nü ni Kalighat tekülem ki semdanga sarasademtsü. Iba sülen ni tamangba yimsü balala amangertem den külemi 'harmony rally' nung shilem agitsü. Iba ya tanga sentong den

sendaktepa mali," ta metetdaksü.

Trinamool Congress-i ayongzükba rally kübok tamangba yimsü balala indang tekülem kitema ayimjema agitsü. Parnoki mosques, Tenla kitem aser gurdwaras densema yimsü balala indang tekülem kitema semdangtsü aser tesüsa Park Circus Maidan nung rally tembangtsü.

Mamata Banerjee-i party nung inyaktertem dang state kübok district ajak nung kasa rally ayongzüka agitsü ayongzükogo.

Yimtenren lenirtem teinyaktsü shilem aser putirtem teinyaktsü shilemji khenyongi balala, ta shia Mamata-i, "Meshitetsüji onok (yimtenren lenirtem) teinyaktsü mapa masü. Iba mapa ya putirtem teinyaktsü mapa lir. Onok teinyaktsüji terenlok mapa lir," ta metetdaksü.



TIR YIMYIM YIMOBILEM (EDITORIAL)

DIMAPUR RASEMNÜ, JANUARY (AENJETI) 17, 2024

India longjemdaksüba jaja

Rahul Gandhi-i anir tang India ajak sema gari nung dang masü saka tetsüng agi dena jajaa nüboritem ajurua jajaba Bharat Jodo Nyay Yatra (Unite India March) sentong ya nüboritem tia metettsü atema timtem agia inyakba sentong ka asütsü. Atangji, ibai election asoshi teyari meshia jajaba sentong ka masü saka Congress teloki BJP-i aniba government majungba indang jembia jajar asünungji, ibai taküm küm ita anasemka tsüngda agitsüba election asoshi nüboyima jajajar amai asütsü. Bharat Jogo Nyay Yatra tetezü India Longjemdaksütsü jajaba sentong ka lir. Ibai mapa temela ka masü, saka India anitsüba telok aser lenirtemi pei tenük agi shitakba India-ji mengura koda yimsü asütsü? Aji oda, India nung yimten telok tetsütemi aser tongtibang lenirtemi shitakba India lushi nung tetsüng majemokra koda asütsü? Shin o nung ashiba ama, "angu nung dang amanger," anungji pei lima nung pei tsüng agi ajemoka aser pei nuk agi nüboritem aliba tia ngua senzüba mapangang shitakba nüboritem tia metettsü. India-ji Delhi dang masü, saka Mahatma Gandhi-i ashi ama, shitakba India-jibo yimtak yimtsüng nungang lir. Aji oda, Delhi nung yimten yimsüsür aser ketdangsertem aliba tesemtembo temerük aser tajung asütsüa akok aser yangji alirtembo aya-tzura aser asükwa -lemiwa memetetba nisungtem asütsüa akok. Aji oda, parnok alidakjibo anüa mair ama aser light oa adokba mengudang aser majangshidang asütsüa akok. Item tesemtem nungjibo lenmang nung auyi aser lishi mangutsü aser lenmang ajungba agi gari kenyongi matashitsü. Iba ama tesem nungji mena yur yimtak light aser tzü agi meperi timtemertem asoshi ozüng aser sentong Delhi nung yanglur. Item jagi yimtak yimtsüng dang masü saka Delhi yimti tezülen makamaitba agi chi mechiyong mejangertem aser ki maka timtemertem indang tia mangu, anungji memetet. Aji oda, Delhi aser Mumbai ama nung tangar bendanger kintem nung yimten lenirtem sendeni aruba mapang nung lenmang anasa sensakertem aliba tesembo, topur tamajung asünungji, mengudaksütsü atema sü agi atsü kümer tongdanga ayur. Ibaji yimti nung alir yimten yimsüsürtemi sensakertem asoshi inyakba mapatem lir. Tanü Rahul Gandhi-i anir Congress teloki MP aika aliba state tulutem dang masü, saka anarongdena MP ka aliba state Nagaland amaia anogo ana asem tashi agia nüboritem ajurua jajatsü aruba ya Congress teloki Naga nung züngshiba mapa ka asütsü. Atangji, tang ya Rahul Gandhii Nagaland sema jajaaka, Nagaland anüdoklen aliba tongtibang tesemtembo mesemdangtet ser anülulen aliba district-tem dang semer aotsü. Ashi, Mokochungnungi Tuensang-Kiphire- Noklak aser Longleng- Mon tashi ao nungbo, ano ilenjiang shitakba Nagaland ngula aser government -i inyakba terenlok mapatem indanga tenük agi ngula. Atangji, India ajak sema aotsüba sentong nung jajadang state shia tesem ajak sema aotsübaji tamakoktsü, anungji tesem ajakleni moutetaka nüboritem ajurua jajaba tesemtem nung alirtemi ashibaji Nagaland ajunga atema ashir asütsü aser town-tem ajanga süidang angubatemi terenlok mapa dak aketba tenük kulitem asütsü. Tang linük nung Congress telok ya opposition nung liaka, Naga nungertemi Rahul Gandhi-i anir Congress telok süidang parnok nem akhüm aser temeim sayua nüboritem longsu-longsua adenshir agizükba mapatemji shisa talang, tangatetba tajung aser yimli mapa ka asütsü. Yimten nung . tsuraburi jembiba ama, kenü pokpo bang aser kenü tenembang asütsü, idangji nüboritemi yimten tangatetba agi ochi aser shitak nung alitsü merangra, Tsüngremi nüboritem nem yimli tajung agütsütsü. Küm 20 jakdangbo Nagaland nung nütsüng ajak Congress liasü aser, ashiko, temulung nungbo nisung aika tanga Congress asütsüa akok. Ajisüaka, tang Naga nung Congress mali akümba yabo, tanga masü, center nung oagi Congress mali ama kümadokba ajanga lir. Anungji, asüng center nung Congress arura, paonungjisa Nagaland nungbo Naga nung ajak Congress kümadoktsü.

OLEMSABANG

Tanü nuburtemi linuk meimba yimsusur aser lennir aginur

~ L. Kika Pongener.

Linuk koba nung yimsusur aser lennir tajung lidir, iba linuk nungji nuburtem sunepa yimjung nung alir aser tejakleni aor. Koba linuk nung yimsusur aser lennirtemi pei nija ajungtsü mebilemi, nubur ajangzüktsü aser linuk renloktsü asoshi inyaker, iba linukji alimai züngshiba linuk ka akümtsü. Tsüngrem oi ashir..."Temeshipur arendang nuburtem pelar; saka temenen nisungi yimsu asüidang nuburtem asükdemer" (A.Shin-29:2). Yimsusur aser lennir shirnok/shiba sudir suaka, pei lima aser nubur memeimba yimsusur aser lennir jagi pei lima telungi ludaktsütsü. Koba linuk nung sudir suaka, yimsusurtemi pei lima aser nubur dang nungi rongsen-ang tali meimra, item yimsusurtem jagi yimsu asüidang, linuk aser nubur dangi atakadem temerenshi bener arutsü. Tesasatsüka, tanü asen lima nung yimsusur teimba ka sen, rongsen aser supokrem agi tenuk pokadoker, metetsümonga ochi paitoker aser ajembanga ayur. Aji oda, metetsümonga ochimashi inyakba yimsusuba menden aser loktiji azükaro masütsü aser akang-akanga nokdaka malitsü. Tsüngrem oi ashir..."Chubai ochiba agi alimaji yanger; Saka shibai sempet (Supokrem) akhanger, Pai aji atsüngdoker. (A. Shin-29:4).

Laishiba nung züngdangra, Solomon chubai Tsüngrem akümtsüba, Tsüngrem nungi shisatsü agir, par nuburtem taginuba angateta yimsu asüba, aser nuburtem dang meima yimsu asüba agi, par putu mapang nung aliba chubatem ajak dang nungi Solomon chuba kanga merena yimsu asüba, tanü tashi otsüsutsüsa jembir. Solomon chuba mapang, pa dangi obendangtsü ken o tasak aika bener aru, saka pai item ken o ajakji takok ngua bendangba agi, par putu nung pa kanga nungtuko chuba ka aküm. Aji oda, Tsüngremi Solomon chuba nem shisatsü dang masü, ali rongsen jenti moatsü aser pa kanga ajungket. Ajisuaka, kanga tesasatsüka, par jabaso Rehoboam tebu ama masü, saka tesashi, taochi maket aser tashiyim agi yimsu asüba agi, pa mapang Israel yimli ana küma lemsatsüsa aküm. Tsüngrem aküm metsübuba chuba aser ochimashi aser pei nubur dang memeimi yimsu masüba agi, tebu-tebuo nung mapang ama masü, Rehoboam chuba mapang par nuburtem kanga asükdema timtema lidaktsü, yongji pa chuba yimli arishia nokdaka meli-i lemsadok.

Tanü asen putu nung yimsusur aser lennir teimba ka yi jemer aser chidiyungdi mazüokba agi asen yimden aser loktiliba teimba ka nung temzüng-ozüng shitak mamshiteter. Apijemtsü shin kaket nung züngra, Lemuel chuba dang Tetsüi sayutsüngi o ashiba yamai shia lir..."Oh, Lemuel yi ajemtsü chubatem asoshi masü; mesura yimsusurtemi temesepba yi mebushitsüla. Ashiko, parnoki ajemtsü aser ozüngji amatsü, aser timtemer dang ochiba tsüa aliba meyipsatsütsü" (A.Shin-31:4-5). Tanü putu nung, yimsusur aika yi jemer/mozü-lartemi yimsu asüba agi asen lima majunger. Yimya agi yi-jemer/mozü-lar kaji tetibo nuji masütsü, aser nuji masüba nisungi kodaser nuburi aginuba ama yimsu sutettsü...??? Chuba menden aser yimden bangdak ya temeshiba agi küma lir, anungji yimsusurtemi aibelen mesui asüngteta, meshiteta, ochishia yimsu asütsüla. Tsüngrem oi ashir, "Chubatem tai menabaji tesempatsü; Kechiyong chuba mendenji temeshiba agi küma lir" (A.Shin-16:12). Anungji yimsusurtem ajaki yi ajemba, chidiyungdiba aser taküm libaliro ajak nung asüngteta azüoka alitsüla.

Tesasatsüka, tanü putu nung, ozüng ammer yimsusur aser lennirtem-iang ozüng raksaba/aibelenba ngua nuburtem kanga sungmanger...!!! Aji oda, yimsusur aser lennir aibelener/ozüng raksartemi kodaser temzüng-ozüng shitak amshia yimsu sutettsü...??? Tanü asen lima nung yimsusur aser lennirtemi takar-sensaker, tulur-tilar, kin-kidong bendanga jakdak-jakdaka tejak repranga yimsu asüba aser obendangba agi nuburtem asüktemer. Tsüngrem oi ashir..."Nisung dang tejak reprangtsü majung; Saka nisungi chiyungtsü tilaka asoshi ozüng raksar" (A.Shin-28:21).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM, Ao Senden, Watsü aser AKM telungjem sarasadem agi



January 16, 2024 nü Ao Senden Conference Hall nung ABAM-i ayongzükba sarasadem sentong nung adenertem tangokba noksa nung angur.

Mokokchung, Aenjeti/ January 16 (TYO): ABAM-i ayongzükba Aor telen balala nungi lenirtem den külemi January 16, 2024 anogo nung Ao Senden, Conference Hall nung sarasadem sentong ka kanga temoatsü ngua agiogo, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Küm tasen ka tenzükba aodang telen ajak nung teinyaktsü mapa ayonga alibatem inyaka aotsü asünung, Tsüngremer teyari nung Aor lokti ochi nung tiptema anir otettsü tashi

meshia sarasademba mapang ka liasü.

Iba sentong ya Alemla Mozür Secreatry ABAM WM leniba nung agi aser ABAM Executive Seretary Rev. Dr. Mar Pongener. Ao Senden Tir Chubawati Longchar, Watsü Mungdang Tir Arenla Longkumer aser AKM Tir Lanutoshi Aier nungeri parnoki teinyaktsü mapatem lemsatepa item ajak takok angutsü asoshi Tsüngrem dak imla inyaktsü lemsatepa liasü.

Tayongzükba O jembidang Rev. Dr. Mar Pongener-i Johan 14:27 nung ajemdaker Yisui yutsüba ochi yimjung

nung amendaker küm tepiyong aotsü asünung tetsüba makai asen Aor lokti inti ochi nung anidi, ta ayongzük.

Tatem nung Rev. L. Yapang Molier Secretary, Church & Mission, ABAM-i ania Tsüngrem taochi aser Pa tatenba lia maparen ajak inyaka aotsü asoshi teloki sarasadema liasü.

Ajak agi lenirtem 40 shi arua iba sarasadem sentong nung aden.

Tsüngremi asen Aortem maneni temoatsü nung aniangma ta sarasadem ayur, ta kasa sangdong ajanga metetdaksü.

Uttar Pradesh nung anti conversion ozüng kübok Khristan 3 apu

January 16, 2024: Uttar Pradesh nung anti conversion ozüng kübok Khristan asem puogo; Uttar Pradesh nung Ghazipur district kübok Saidpur nung police-i Pastor Ramjit Rajwar'er ki mita aoba sülen pastor den Khristan ana apu.

Hindu yimsü alia amanger, Jitendra Singh-i tashishiba ken o agütsüba nung ajemdaker police-i Khristan asemji apu.

January 15, 2024 nü police-i par asem apuba sülen local court kati par asemprong judicial ket nung agütsüogo.

Khristan lenir kati, "Parnoki aibelena mali, ta court dang ashi aser court dang parnok bail nung chiokang ta mepishi, ajisüaka temepishibaji magizük," ta metetdaksü.

January 16 nü osangbenertem den jembidang Arogo lenir kati, "Kobi melii onoki bail temepishiba agütsütsü," ta metetdaksü.

Hindu nunger Singh-i, "Pastor Rajwar den Khristantemi kü kinüngtsü küna dang Khristan yimsü

dangi meyipang ta ajungshi. Khristan yimsü dangi meyipra sayatenya ajanga kü kinüngtsü shirang aneptsütsü, ta parnoki onok dang nangzük," ta tai tonglokja liasü.

Pastor aser Khristantemi Hindu yimsü majungba indang jembiba ajanga kü melung yirutsüogo, ta Singh-i police nem metetdakja liasü.

Police-i pastor Rajwar'er ki mita aoba mapang nung Laishiba densema Khristan yimsü dak sendakba kaket aika apu.

India nung nütsüng teimtiba aliba state ji Uttar Pradesh lir. Yaküm India nung Khristantem anema inyakba tatalokba teimtiba aliba state ji Uttar Pradesh liasü. Yaküm January nungi November ita tashi nung UP nung Khristantem anema inyakba tatalokba 287 liasü, ta United Christian Forum (UCF)-i metetdaksüogo.

Uttar Pradesh sorkari state nung tamangba yimsü melenshiba nokdangtsü nükjidong nung 2021 küm anti-conversion law ozüng benok. Tang India kübok

state 11 nung anti conversion ozüngtem benoka lir aser item state teimbaka BJP-i yimsüsüba state tem lir.

Uttar Pradesh Prohibition of Unlawful Conversion of Religion Act benokba sülen iba ozüng kübok Khristan 400 dak tema pua tepuokdak yuogo.

Khristan lenir kati, "Iba ya tang Uttar Pradesh nung yimya tasen ka kümogo. Nisung kari sarasadem sentongtem nung adentsü aruba sülen Khristantem nem tai tongloksür," ta ashi.

Arogo lenir kati, "Pastor Rajwar-i pai teti agia aruba ama pa leniba nung sarasadem sentong agia liasü, saka iba sentong nungji pai shinga Khristan yimsü dangi memeyipdaksü. Khristan kati par kidang Temeshi Laishiba den Khristan kakettem meyutettsü asü?" ta asüngdang.

Nütsüng million 200 dak tema aliba Uttar Pradesh nung nütsüng shilem 0.18 dang Khristantem lir saka iba state nung Khristantem anema inyakba kanga bulua kümogo.

ANOGO ABEN TSÜNGREM DEN

Kodang Tsüngremi jembidir, yamaji alir

Yamaji kü bang nungi aoba kü o alitsü: aji amajok nung kü dangi meyipa marutsü, saka aji agi ni aginüba ataloktsütsü aser ni koba asoshi yok iba nung azükarutsü. Isaia 55:11.

Kodang Tsüngremi jembidir, kecha mataloki malir, memelenshir malir. Tetenzük mapang nungi, Tsüngremi jembiba aser kecha makaba nungi alima yanglu. Tsüngremi alima yangludang Pai timi tarensena ka nung (pattern) yanglu: Pai jembi, yamaji liasü, ibaji junga liasü (Lipok 1:3-4). Ibai tarensena Laishiba ajunga jungkai adoktsü; Pai ashiba ama mapa ajak atalok aser Tsüngremi aji junga angu (Fil. 2:13). Tsüngremi tebilemba meshidang Pai jembiba mapa akümtsü ta temulungtetba Pai jembi.

Kodangsa Yisui jembi Pai jembiba ama atalok. Chitemra akettertem Yisu nungi O ka jembibaji taneptsü ta angu (Luke 5:13; 17:14). Nükpokeri Yisu nungi o ka jembibaji angutsü tenük ta angu (Luke 18:42). Yisu nungi atakatem o kaji teraksa ta nütsüngtemi mongu zü nu dong nungi angazük (Mark 11:20). Yisu o nungi temenen puri tatok angur (Yn. 8:11). Lazar shia arudaktsütsü asoshi Yisui kwiben merang? Ken dang (Yn. 11:43). Yisui jembiba o kecha matalok mali.

Yisui ne den jembidang kechi ataloker? Yisui jembiba otem Laishiba nungi azüngdang ne taküm nung temelenshiba kecha makai azünger asü? Yisui Farisitem aitsü kechiaser zülua alibaji metetba ajanga parnok nem taküm agütsütsü ta parnoki amang. Shibai oji jembi paji akatsü melen parnoki o akaba nung temulung süa liasü (Yn. 5:39). Tsüngrem nungi o kaji ne taküm nung koda tashi tait lir! Nai Laishiba azüngdang aser sarasadem dang, Tsüngremi ne taküm asoshi kechi mulung angang.

Yaküm India nung Khristantem anema inyakba tatalokba 720 liasü

January 16, 2024: New Delhi Khristantem anema inyakba nung amenoka aliba Khristan osang 23 metetdakja liasü. organization United Christian Tatembangbuba hopta nungji Forum (UCF)-i, yaküm küm Uttar Pradesh nung piyong nung India linük nung Khristantem anema inyakba tatalokba 10 liasü; Andhra Pradesh, Karnataka aser Punjab state tem shia nung Khristantem anema inyakba tatalokba asemsem liasü aser Chhattisgarh, Delhi, Madhya Pradesh aser Rajasthan state shia nung Khristantem anema inyakba tatalokba kaka liasü.

UCF National Coordinator, A C Michael-i sangdong ka ajanga, 2023 küm tatembangbuba hopta (December 24-31) nungbo anogo shia Khristantem anema inyakba tatalokba asemsem liasü, ta metetdaksü.

Khristantem anema inyakba tatalokba asemsem liasü, ta metetdaksü. Khristantem anema inyakba tatalokba anana dang liasü saka Khristantem anema inyakba tatalokba asemsem liasü. Khristantem anema inyakba tatalokba asemsem liasü.

UCF indang helpline (1-800-208-4545) ajanga December 24 nungi December 31 tashi nung Khristantem anema inyakba tatalokba asemsem liasü.

AO OSHI ANGAZÜKDAK:
TANÜ ANGAZÜKTSÜBA OJANG



Shirem

(n) süngjanglijang, süngolio aser shi ango ajak achiba arem shiruru tulu (bear)

* Shiremi nokdaker jajateter.

Shirep

(adv) shizüka ao (rotten)

* Arem nung süng ayuba ajak shirep.

OLONG PAITEP # 6669

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

- 2. Auonungchiyongsüasenba
- 5. Mangyimba mapang
- 7. O tamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

LANGTSÜNGLEN

- 1. Lenmang
- 2. Aor kidong ka tenüing
- 3. Tenarong maten
- 4. A___g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S___k
- 14. T___r

OLONG PAITEP # 6668 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.

NAI-A YA METETTER MA

2,46,252 Participants



Nagpur nung amenokba aliba startup Habuild-i January 12, 2024 nü otsü tase ka yanglutetogo. Habuild ya Yoga platforms tongtipang ka lir aser anogo 21 tashi angati nisung teimtibai yoga aiba indang World Record ka yanglutet. Habuild-i 21-Day Challenge ayonga agiba nung aliba tesem balala nungi nisung 2,46,252 tashi Live Yoga Sessions nung shilem agi.

Moreh SDPO tepsetba atema tongti tai tongloktsür puogo



Philip Khaikholal Khongsai

Guwahati, January 16, 2024

(Agencies): Manipur police special commando unit den Moreh police-i Hombarnü Moreh College anasa nisung ana apu.

Indo-Myanmar arrtsü anasa aliba Moreh jila nung tena ket nung prangpong-injangtem apu.

Tenati police telok anguba sülen injang khaloktsü aser temeket aliba ki kar nung jenok. Idangji police-i tena jenokba kitem longbanger tena apu.

Tena ya Marcus Khongsai'er jabaso Philip Khaikholal Khongsai aser Onkholun Mate'er jabaso

Hemkholal Mate na jangjaogo.

Tena ket nungi pistol ka den live rounds 2, Chinese hand grenade 1, AK series 10 live rounds, aser detonators 10 den fuse ngutetogo.

Tena dang asüandangya asüandang Moreh Defense Force/ Village Volunteers Force Moreh nung tongti lennirtem ta langzü.

Moreh Sub-Divisional Police Officer (SDPO) Chingtham Anand Kumar tepsetba nung Philip dak tongti süa tai tonglokja lir.

October 31, 2023 nü Moreh nung helipad ka yanglutsü atema school ground ka merüktedtang SDPO Chingtham khaset.

Tena apuba sülen tena pusemer kari Moreh police station nungpoka atutsü merang saka sepaitem parnok noktang.

Moreh police officer tepsetba nung tongti süa tai tonglokja aliba nisung apuba atema valley district nung alirtem pelateper.

Assam MP Gogoi-i National Highways tebilemetsü lemsatep

Guwahati, January 16, 2024

(Agencies): Assam MP Gaurav Gogoi-i Union Road & Transport Minister Nitin Gadkari dangi shidi ka nung National Highways tia mejungi aliba osang metetdaktüsügo.

Gogoi-isa National Highways & Infrastructure Development Corporation Limited (NHIDCL)-i mapa shitak meinyakba shia lir. NHIDCL-i Northeast nung terenlok mapatongtem züngzünga meinyaker. Assam nung National Highway No 37 tia kanga mejungi lir aser iba lenmang ya kanga tongtipang ta pai ashi.

"NH 37 majungba ajanga senzusenbongertem kanga timtemer. Traffic teimba aküba den maparen kanga inyaksangshiba ajanga nisungtem

kanga senzür. Numaligarh-Dibrugarh 4-lane highway nung Teok-Sivasagar section kanga majung lir aser mapang shia contractor melenshir" ta Gaurav Gogoi-i ashi.

Assam nung NH-37 nung ongken aser tesem aika nung lenmang pakdanga lir aser iba ya lendong lir. Tzüngluruwa mapang item tesem nung tzü atsüngdener aser gari nung senzürtemi timtem kanga ajurur, ta paisa ashi.

NH-29 nung Parokhuwa to Lahorijan stretch atema ali melen temenok aser ali agiba maparen nung tim masüba inyakyim lir ta Kaliabar MP Gogoi-isa ashi.

"Karbi Anglong district kübok Parokhuwa nungi Lahorijan stretch tsüngda ali dak sendakba maparen nung tim masüba aika

lir. 3D notification nung fake beneficiaries aika lir aser parnoki tim masüleni senotsü nguogo" ta Gogoi-isa ashi.

"NHIDCL-i züngzünga mapa meinyaker aser public o local administration den amalitep mali. Iba ajanga terenlok mapa aika shitak inyaka mouteter aser Assam nung alirtem asoshi khuret bentsür arur. Anungji Assam nung NHIDCL maparen bushisüngdangtsü aser mapang shitak nung Numaligarh-Dibrugarh 4-lane highway nung Teok-Sivasagar section renemtsü mepishir" ta Gogoi-i Union Road & Transport Minister Nitin Gadkari dang ashi.

Paisa Golaghat district kübok Dergaon nung tawa lendong atalokba nung tasürtem atema teyari meshiogo.

Assam Baibhav Award 2023 angutsüpurtem metetdaksü

Guwahati, January 16, 2024

(Agencies): Assam Chief Minister Himanta Biswa Sarma-i January 16 nü Assam nung Highest Civilian Awards angutsüpurtem tenüing metetdaksügo.

"Taoba Chief Justice of India Ranjan Gogoi nem Assam Baibhav Award 2023 agütsütsü aser iba ya Law and Justice wadang tsütsü lir" ta CM Sarma-i ashi.

Taoba advocate aser judge

Ranjan Gogoi-i India nung Chief Justice of India 36 buba inyakogo. Pai August 28, 1978 nü advocate ka ama enrol asü aser February 28, 2001 nü Gauhati High Court nung permanent judge akum.

Ranjan Gogoi-i Supreme Court of India nung Chief Justice inyakdang Ram Jananmbhumi - Babri Masjid ken o atema oshidang agüja liasü.

Pa ya tang Rajya Sabha MP ka lir. March 16, 2020 nü

President Ram Nath Kovind pa nominate asü.

CM Sarma-isa ace swimmer Elvis Hazarika aser athlete Hima Das nati saisapongbaren tsütsü Assam Saurav Award angutsü ta ashi.

Assam Saurav nung medal ka den Rs 4 lakh senpet dena lir.

February 10 nü sentong ka nung Vice President Jagdeep Dhankhar-i Assam Highest Civilian Award for 2023 lema agütsütsü.



January 16, 2024 nü General Officer Commanding III Corps (Spear Corps) Lt Gen HS Sahi-i Mizoram Governor Dr Hari Babu Kambhampati den Raj Bhavan nung ajurutepeba noksa angur. Iba senden nung IG(East), Assam Rifles Major Gen VK Nambiar, DiG, 23 Sector Assam Rifles Brig Girish Upadhyay aser tanga ketdangsurtem aden.

Iran-i Iraq aser Syria nung missile khaloktsü

Tehran, Aenjeti/January 16 (Agencies): Iran indang Islamic Revolutionary Guard Corps (IRGC) ajanga Iraq indang Kurdish region nung Israel indang "spy headquarters" nung ballistic missiles khaloktsü aser northern Syria nunga ISIL (ISIS) den sendaktepa aliba targets tem amak aser ibai par security kumzuka ayur aser kiralongraba anema inyakba lir, ta ashir.

Iraq indang semi-autonomous Kurdish region yimtiba, Erbil nung Mongulbarnepe ti ben apokba angashi. Nisung pezü aser trok yiru, ta regional security council ajanga ashir.

"Region nung Iran anema kiralongrar teloktem adenshiba aser 'espionage centres' tem raksatsütsü atema ballistic missiles amshi," ta IRGC ajanga sangdong ka nung ashir.

Iraq sorkari iba inyakyim aitsü aser Iran-i Erbil nung tashiyim amshiba ajanga residential area nung civilian tepset aser ibai linük indang sovereignty aser yangji aliba nübur indang security nung aibelenba lir, ta Ministry of Foreign Affairs ajanga sangdong ka nung ashir.

Sorkari maparen balala asadanger aser United Nations Security Council nunga ken o benoktsü ta ashir.

IRGC yagi Erbil nung Israeli spy ahency Mossad indang headquarters amak ta ashir.

"Linük asoshi takum laluz azü tatemsa mang mayang tashi Guards temi maneni operation agitsü ta onoki asen linük dang ashir," ta ashir.

Kurdish region indang ato kilonser Masrouf Barzani-i Erbil amakba ya Kurdish nübur anema mapa tamajung inyakba

lir ta aitsü. Tehran-i danga linük indang sovereignty aser territorial integrity akumtsübor, saka national security asoshi timtem agütsütsü aliba nokdangtsü atema temeden shidak amshir, ta Iran indang Ministry of Foreign Affairs odongtar Nasser Kanaani-i ashir.

Iba lendong indang jembishinütsü atema Iraq-i Tehran nungi par ambassador jaokogo, koba United States-ia aitsü.

Kiralongrari amakba aser meimchir yimya nung masüba mapa inyakba ajanga Erbil tsüboa mali, ta Erbil Governor Omed Khoshnaw-i ashir.

Iba lendong nung civilian tem tepseter rongnung Kurdish nunger multimillionaire businessman Peshraw Dizayee aser par kinunger kar densema liasü.

Philippines-i Taiwan nem tenüngsang agütsüba China-i jashir

Beijing, Aenjeti/January 16 (Agencies): Taiwan tir election nung takok angur nem Manila-i tenüngsang agütsüba sülen China-i Philippines ambassador jaokogo.

Taiwan nung tawa tir election agiba nung takok anguba atema Philippines Tir Ferdinand Marcos-i Lai Ching-te dangi tepela shiti ka zülur

anogo ka lir China-i Mongulbarnü aitsü. Beijing-i o kanga meshidak jembia Manila dang mi den masayatsü tekumdangtsü ashiba ajanga linük ana tsüngta tensa tamajungba akumtsü, shirnok South China Sea mechi raratepa arur.

Hombarnü social media post ka nung Marcos-i China

anemer Lai dang tarutsü nung külemi teka amteper inyaktsü yongya atar ta shia liasü.

Marcos-i jembiba nung China kanga mepelar aser anema nokdaker, ta Beijing indang Ministry of Foreign Affairs odongtar Mao Ning-i ashir aser Manila dang kanga junga rasaa ashitsü ajungshi.

(Maneni tapak 8 nung...)

US meyong container ship ka nung Houthi-i missile khaloktsü

Sanaa, Aenjeti/January 16 (Agencies): Yemen indang tzükum anasa Houthi telungpuri US meyong khu abenba rong ka nung ballistic missile ka khaloktsü, ta US-i ashir.

Iba rong Gibraltar Eagle nung yiruba mesüra sashia raksaba mali, ta United States military command for the Middle East (Centcom) ajanga ashir.

Marshall Islands nungi ayamesoba rong ya maneni Gulf of Aden nung jajatar.

Israel-i Hamas anema raraba mechi Iran-i yariba Houthis telungpur yagi November ita nungi tenzüka rong amaker.

Shipping company Eagle Bulk Shipping ajanga ashiba agi, iba rong nungya steel agi yangluba osettem bena liasü aser Gulf of Aden nung tzükum nungi mile 100 shi pilar lia missile ya khaloktsü.

Iba rong nung bena aliba khu kar raksatsü saka junga lir aser iba tesem nungi ainshio go ta ashir.

Ghonda ishika tejakdang Centcom ajanga ashiba ago, ano missile ka Red Sea nung US destroyer alileni khaloktsü saka US fighter jet kati khazüka yok.

Houthis yagi Red Sea nung shishilempaba rong tem amaker, koba Israel den sendaktepa lir

mesüra Israel rongnendaki aortem lir ta iba telok yagi ashir. Ibai Gaza nung Palestine aser Hamas nunger bhukumba sayua inyaker lir ta parnoki ashir, kong Israel mitkar temi maneni raratagi.

Gibraltar Eagle ya Israel den sendaktepa aliba rong masü ta British maritime security firm Ambrey ajanga ashir.

Saka Houthi ketdangsur kati Hombarnü ashiba agi, parnoki America nunger rong ya 'targets' ama züngshir. "America nunger rong dang süra onoki amaktsü," ta Nasr al-Din Amer-i ashir.

(Maneni tapak 8 nung...)



Japan kübok Hokkaido nung New Chitose Airport nung Korean Air passenger tayimtsü ka aser Cathay Pacific tayimtsü ka Mongulbar nikongdang 5:30 ako meta tsüktepa liasü. Korean Air plane nungya passenger 289 mena liasü aser Cathay Pacific nung nisung kata meliasü. Rer alaba mechi Mongulbarnü kisüng nunga iba region nung tayimtsü 46 dak tema athi.

MULUNGNEN O



ASO:
26.06.1936

ASÜ:
11.01.2024

Onoki teti meima aliba Ojala **SUPONGJUNGLA** (Yimjenkimong) la shiranga yipden nung mapang tatsüka alidang nungi akümüli wadang atemba anogo tashi lokti aser kija, yimer aser bendanglen nungi shirnokisa nübu, rongsen, aria bilemba nüktzü aser sarasadem agi yaritepogo nenok ajakdang ozü mulungjang taroktiba nungi kanga pelaba lemsateper.

Teyanglur Tsüngremi nenok ajak talubosa moajang ta ozü sarasadem.

~ Temeim Chirnur, Semchir aser Kinungertem.

Iowa senden nung Trump-i takok angu



Des Moines, Aenjeti/January 16 (Agencies): taoba United States tir Donald Trump-i Iowa senden nung kanga junga takok ngutetogo, anungji 2024 nung pai White House tanaben agitsü merangba nung Republican telok nungi pa jenjang tajungba akumer.

Trump-i ayong ayonga taoba US Ambassador to the United Nations Nikki Haley aser Florida Governor Ron DeSantis madak takok nguteta tir atema tokteptsü asoshi asembe buba shimtsü jenjang anameta lir.

Delegates 40 nungi Trump-i 20 angu, DeSantis-i ti angu aser Haley-i tenet angu ta osangtem ajanga ashir.

Biotech startup founder Vivek Ramaswamy, shibai delegates ana akok, pai iba osang temai adokba mapang tir asoshi toktepba nungi anener aser Trump yaritsü ta sangdong.

Trump anema ken o aika benoka tejembidak süaka Republican Party madak pai maneni amokbanga aliba sayur.

Mongulbarnü Trump ya New York nung aliba okadak nokdaksü südi ta imlar, kong kaket zülur ka dak tim masüba mapa inyakba aser tenüng menüktsüba atema senchi sen million \$5 chir aliba ano achitsü asü ta obendanger kati asadanger.

Trump anema ken o balala benoka liaka Republican telok nungi pa bhukumer majemshir aser aikati item ken o ya yimtenren tsütsü tenük yokba ka dang lir ta bilemer.

Iowa nungi Republican nominee shimtsü atema takzutsü tasak aser GOP presidential candidate-i iba state nung tesüsa takok anguba ya George W Bush-i 2000 küm

nguteta liasü. Ajisüaka New Hampshire, Nevada aser South Carolina nung aliba delegates asoshi toktepba candidate tem atema iba Midwestern state ya kanga tongtipang lir.

2024 küm tir atema tokteptsü asoshi mezüngbuba vote agitepdang Iowa nung alirtem asük arema school, community centre aser danga tesem 1,600 dak tema nung adenshia liasü.

Iowa nung aliba Republican voter aikati par rongsenketzüng, refugee, migrant aruba aser alima tensa majung aliba tebilemstü bentettsü asoshi Trump ya candidate tajungtiba ta ashir.

"Tang atema onoki iba presidential campaign anena atar. Ni taruba tir asütsü lenmang kecha mali. Ni Donald Trump den jembia pai takok anguba tenüngsang agütsüogo aser tang nungi tir asoshi kü indang endorsement ajak pa den alitsü," ta Vivek Ramaswamy-i ashir.

Ramaswamy-i Trump ya century 21 buba nung tir tajungtiba ta tushia liasü. Ajisüaka pai Republican tem dang mera tasen agia America First agenda temaba jenjangi bener aotsü ajungshi.

Ramaswamy-i Des Moines nung aliba Surety Hotel nungi osangbener aser pa bhukumertem den jembia liasü. Nisung aika pa dangi arua nüburtem asoshi maneni inyaktsü ajungshi.

Hopta tatemlen pa New Hampshire-i aotsü aser Donald Trump atena nübu yima jajatsü ta Ramaswamy-i ashir aser pa bhukumertem dang Trump ya US tir kumdaktsütsü ajungshia liasü.

FIFA Best Awards: Lionel Messi-i best male player sempet angu

London, Aenjeti/January 16 (Agencies): London nung Argentina forward Lionel Messi-i Fifa Best Awards nung Men's player of the year sempet angu aser Manchester City manager Pep Guardiola-i Men's coach sempet angu.

Inter Miami nungi Messi sülen City striker Erling Haaland liasü aser tasembuba nung Paris St-Germain attacker Kylian Mbappe liasü.

City nungi Ederson-i goalkeeper award angu aser tanabuba aser tasembuba jenjang nung Real Madrid nungi Thibaut Courtois aser Al Hilal nungi Yassine Bounou liasü.

2022-23 nung Manchester City-i Premier League, Champions League aser FA Cup takok marok nguteta lir.

2023 küm arishi küm 36 tain Messi ya Paris St-Germain nungi tenzük aser June ita Major League Soccer (MLS) club Miami dangi ao.

2016 küm nungi iba awards agütsü tenzükba sülen Messi-i Best men's player award ya asemben buba nguogo. Taoba mapang pai 2019 aser 2022 nung ngua liasü.

PSG-i French Ligue 1 title akokba mapang Messi-i goal toku agütsü aser United States nung Inter Miami-i mezüngbuba Leagues Cup akokba mapang asaya tenet nung pai goal ter



2023 FIFA best players sempet angur Aitana Bonmati aser Lionel Messi.

agütsür liasü.

Taoba season nung Haaland-i otsü yanglua Premier League goal 36 agütsü. 2022-23 mapang asayamung balala nung pai club asoshi otsü yanglua goal 52 agütsü aser item rongnung 28 bo World Cup sülen liasü aser tang season August 20 matongdang goal ana agütsüogo.

Messi ama France nunger Mbappe-i PSG den Ligue 1 title akok aser Golden Boot ponguben atonga angu.

Arishi küm 25 tain Mbappe-i December 19, 2022 nungi August 20, 2023 tsüngta PSG asoshi goal 18 agütsü, aser iba mapang nung ajemdaker iba

awards ya agütsür.

National team managers, captains, journalists aser fans temi Fifa indang website nung vote agüja iba award ya agütsü.

Messi aser Haaland ya point kasa nung tembang, saka national team camptain tem nungi shimba nung Messi mezüng aliba mechi pa nem iba sempet ya agütsü.

National team captain tem rongnung Harry Kane, Mbappe, Mohamed Salah, Andy Robertson, Aaron Ramsey aser Luka Modric nungeri Messi nem agütsü aser Ilkay Gundogan, Casemiro aser Messi nungeri Haaland nem agütsü.

Fifa Best Awards ya yimya

agi calendar year ka nung ajemdaker agütsür aser Ballon d'Or awards den balala, kong season ka nungi asadanger agütsür aser yangjia Messi-i tiben ngua lir.

Ajisüaka taoba küm Qatar World Cup adenba mechi taküm men's Fifa Best Awards aser Puskas Award ya December 19, 2022 nungi August 20, 2023 nung ajemdaker tendanga liasü.

Taküm iba sentong ya London nung aliba Hammersmith Apollo nung ayongzüka agi, kong taoba best players aser tang asayartem dena liasü.

Men's coach of the year sempet Guardiola nem agütsü aser pa sülen Luciano Spalletti aser Simone Inzaghi liasü.

Spalletti lenisüba kübok Napoli-i küm 33 tsüngta Serie A title mezüngbuba nguteta liasü.

Inzaghi-i aniba Inter Milan-i Coppa Italia akokba sülen ano Champions League final tongteta asayaba sülen pa nominate süa liasü.

Men's team of the year nung Manchester City nungi asayar trok - defenders John Stones, Kyle Walker aser Ruben Dias, midfielders Bernardo Silva aser Kevin de Bruyne aser striker Haaland nunger züngoka lir.

Men's team of the year nungya Thibaut Courtois (Real Madrid), John Stones, Kyle Walker, Ruben Dias, Bernardo Silva (ajak Manchester City nungi), Jude Bellingham (Real Madrid), Kevin de Bruyne aser Erling Haaland (Manchester City nungi), Kylian Mbappe (Paris St-Germain), Lionel Messi (Inter Miami) aser Vinicius Jr (Real Madrid) alitsü.

Puskas Award ya goal tajungtiba agütsüteter nem agütsür aser taküm iba sempet ya Brazil second-tier Botafogo nungi asayar Guilherme Madrugá nem agüja liasü.

Philippines-i Taiwan nem tenüngsang...

Marcos-i jembiba ya iba asetkong nung overseas Filipino workers (OFWs) 200,000 aliba densema Philippines aser Taiwan arok tejangraba angateta jembiba alir, ta Philippines Foreign Ministry ajanga ashi.

"Tir Marcos-i tir tasenba nem tenüngsang agütsüba ya ozü OFWs tem aniokba aser democratic yimya takok ngua amshiba atema pelaba lir. Ajisüaka Philippines ya One China Policy nung nokdaka lir," ta Foreign Ministry ajanga sangdong ka nung ashi.

Ajisüaka iba o ya "one

China" principle nung aibelenba lir, ta Mao-i ashi. One China principle yagi Taiwan ya par meyong südaktsütsü asoshi tamendak dak agütsür.

Marcos-i jembiba ya Philippines-i China tsütsü political commitment agiba nung kanga mejungi aibelenba aser China telungzük inyakyim nung teka sangshiba lir, ta Foreign Ministry odongtari ashi.

"Taiwan ken o nung mi den masayatsü aser Taiwan dak sendakba nung o meshidak jembiba aser mapa meshidak inyakba anentsü onoki

(Tapak 7 nungi...)

Philippine dang ashir," ta lai ashi.

Taiwan ya linük ka ama züngshiba linüktem den Beijing-i tesendaktep mayur aser danga linüktemi Taipei den sendaktepba anema nokdaker.

Taiwan nüchiso bhukumsang Lai-i Honibarnü tir election nung ayong ayonga takok angu. Tir inyaktü shimteta alisangi China den jembishinütsü ayongzük saka Beijing-i magizük.

Lai-i takok anguba atema US Secretary of State Antony Blinken aser Japanese Foreign Minister Yoko Kamikawa nungeria tenüngsang agüja liasü.

US meyong container ship ka nung...

Houthi teloki Red Sea nung khu abenba rong amakba mechi aliba nung shipping company tulutiba tem lenmang melenshir aser aliba nung shishilempaba nung temelenshi adoker.

Hombarnü iba lendong atalokba mechi US Department of Transportation ajanga US nisan aliba aser US meyong commercial vessels tem Red Sea aser Gulf of Aden nung tesem kar nungi ainshitsü metetdaksü.

Alima nung totzü yangluba company tulutiba jenjang tanabuba nung aliba QatarEnergy-i iba tzü lenmang

ajanga rong senzüba anena atatsü Hombarnü sangdong.

Rong amakba tayang kepzüka US aser UK sepaitemi Yemen nung Houthi targets nung amak. Linük ana nungi sepaitem yagi tembar linüktem den angatettepa Yemen telung nung Houthi missile launch sites aser air defence systems nung anünglen aser tzüyim nungi amak.

UK Ato Kilonser Rishi Sunak-i, par sepaitemi Houthi launch sites 13 raksatsüogo, ta Hombarnü ashi. Sunak-i tarutsü nung mera agitsü atema balaka mejembiba saka kecha meinyakra

regional security tashi maitba akumtsü ta ashi.

Kasa mapang Houthi indang chief negotiator Mohammed Abdulsalam-ia Israel nunger rong mesüra Israel rongnendak bushia aoba rong nung amakba manentsü ta ashir.

Houthi telungpur ket nung missile aliba atema Washington-i Iran tenüng asener, saka Tehran-i magizüker. West-i Yemen anema raraba tangsa anentsüla, ta Iran indang foreign minister Hossein Amir-Abdollahian-i Hombarnü osangbener senden ka nung ashi.

(Tapak 7 nungi...)

Nagaland Olympic & Paralympic Games 2024 ayonger

Dimapur, Aenjeti/January 16 (TYO): Nagaland Olympic & Paralympic Games 2024 ya February 12-17, 2024 anogotem Dimapur aser Chümoukedima district nung alitsü, ta Nagaland Olympic Association (NOA) sangdong ka ajanga ashi.

Iba asayamung nung Archery, Athletics, Boxing, Badminton, Basketball, Cricket, Football, Lawn Tennis, Pencak Silat, SepakTakraw, Taekwondo, Table Tennis, Volleyball, Belt Wrestling, Wrestling, aser Wushu nung tetoktepa alitsü.

Paralympic sports temaba jenjangi ajungkettsü aser nisung ajaki shilem agitsü mechi Paralympic games-a alitsü, saka iba asayamung yabo inter-district team nung masayatsü.

Asayartem aser team indang registration ya online ajanga agitsü. Nagaland Olympic & Paralympic Games atema registration link ya lapokogo aser January 29, 2024 ya tatem asütsü. Asayartem tenüng zülüokba sülen tenüng melenshiba malitsü, ta

sangdong ajanga ashi.

Games Organizing Committee ajanga tanenzükdak, local transport, chiyongtsü aser technical competition arrangements agütsütsü. Asayartem arutsü aser aotsü anogo sangdong balaka nung agütsütsü.

Nagaland Olympic & Paralympic Games 2024 atema osangtsüsang agiteptsü asoshi Kajiiloni Krichena (+91-7085333972) aser Khuvinu Tase (+91-8415035548) shimogo.

Districts Chef de Mission, Deputy Chef de Mission ajanga dang January 25, 2024 tashinung online registration ajak tembangtsü mepishir, ta NOA sangdong ajanga ashi.

Iba Games atema trophy tenet alitsü aser itemji: Team Championships Winners, Team Championships 1st Runner-Up, Team Championships 2nd Runner-Up, Spirit of Olympics Award, Olympic Fair Play Trophy, Outstanding Sportsman aser Outstanding Sportswoman alitsü, ta sangdong ajangasa ashi.

BILEMDANGANG

"Nai na metetang, nü tsükchir metetang aser nai tongpang aika akoktsü."